

В ЧЕТВЕРТОК ПЕРВЫЯ СЕДМИЦЫ НА ВЕЧЕРА,

во светильничном обычное стихословие. На Господи воззвах, стихиры подобны Триоди. Иосифа. Глас 2:

Подобен: Просветителя нашего:

Омрачена мя прелестьми борца, / Христе мой просвети, / омрачивый на Кресте висий солнце иногда, / и просветивый верным свет истинный, / оставления яве, / яко да ходяй во свете Твоих повелений, / достигну чисте Воскресения Твоего / зарю спасительную.

Подобен:

Якоже виноград на Древе Спасе висия, / вином напоил еси / нетления Христе концы. Темже вопию: / пьянством мя греховным люте омрачаема присно, / сладостию умиления истиннаго напоив, / поститися мя ныне от сластей укрепи Спасе, / яко Благ и Человеколюбец.

Ин подобен кир Феодора, глас тойже.

Подобен: О великаго таинства:

О Креста Твоего силы! / Сей процвете Церкви воздержание, / во Едеме иногда Адамово невоздержание / из корене исторг: / смерть убо оное принесе человеком, / но сей нетленно источает бессмертие миру, / якоже из источника инаго райскаго, / изливанием Твоея животочныя крове, / вкупе же и воды: / отонудуже вся оживотворишася. / Имже нам постную пищу услади /Боже Израилев, / имей в велию милость.

И в Миней 3. Слава и ныне, Крестобогородичен.

Прокимен, псалом 15, глас 4: Благословлю Господа вразумившаго мя.

Стих: Сохрани мя Господи, яко на Тя уповах.

Бытия чтение. [Глава 2, ст. 4 – 19.]

Сия книга бытия небесе и земли, егда бысть, воньже день сотвори Господь Бог небо и землю: И всякий злак сельный, прежде даже быти на земли, и всякую траву сельную, прежде даже прозябнути: не бо одожди Господь Бог на землю, и человек не бяше делати ю. Источник же исхождаше из земли, и напаяше все лице земли. И созда Бог человека, персть [взем] от земли, и вдуну в лице его дыхание жизни: и бысть человек в душу живу. И насади Господь Бог рай во Едеме на востоцех, и введе тамо человека, егоже созда. И прозябе Бог еще от земли всякое древо красное в видение, и доброе в снедь: и древо жизни посреде рая, и древо еже ведети разуметьное добраго и лукаваго. Река же исходит из Едема, напаяти рай: оттуду разлучается в четыре начала. Имя единой Фисон: сия окружающая всю землю Евилатскую: тамо убо есть злато. Злато же оныя земли доброе: и тамо есть анфракс, и камень зеленый. И имя реце второй Геон: сия окружающая всю землю Ефиопскую. И река третья, Тигр: сия проходящая прямо Ассириом. река же четвертая Евфрат. И взя

Господь Бог человека, егоже созда, и введе его в рай сладости, делати его и хранити. И заповеда Господь Бог Адаму, глаголя: от всякаго древа, еже в рай, снедию снеси: от древа же, еже разумети доброе и лукавое, не снесете от него: а воньже аще день снесете от него, смертию умрете. И рече Господь Бог: не добро быти человеку единому: сотворим ему помощника по нему. И созда Бог еще от земли вся звери сельныя, и вся птицы небесныя, и приведе я ко Адаму, видети, что наречет я: и всяко еже аще нарече Адам душу живу, сие имя ему.

Прокимен 2, псалом 16, глас 4: Сохрани мя Господи, яко зеницу ока.

Стих: Улыши Господи правду мою.

Притчей чтение. [Глава 3, ст. 1 – 18.]

Сыне, моих законов не забывай, глаголы же моя да соблюдает твое сердце: Долготу бо жития, и лета жизни, и мир приложат тебе. милостыни и вера да не оскудевают тебе: обложи же я на твоей выи, и напиши я на скрижали сердца твоего: и обрящещи благодать. И промышляй добрая пред Господем [Богом] и человеки. Буди уповая всем сердцем на Бога, о твоей же премудрости не возносися: Во всех путех твоих познавай ю, да исправляет пути твоя. Не буди мудр о себе: бойся же Бога, и уклоняйся от всякаго зла: Тогда исцеление будет телу твоему, и уврачевание костем твоим. Чти Господа от праведных твоих трудов, и начатки давай Ему от твоих плодов правды: Да исполнятся житницы твоя множеством пшеницы, вино же точила твоя да источают. Сыне, не пренебрегай наказания Господня, ниже ослабевай от Него обличаемый: егоже бо любит Господь, наказует, биет же всякаго сына, егоже приемлет. Блажен человек, иже обрете премудрость, и смертен, иже уведе разум. Лучше бо сию куповати, нежели злата и серебра сокровища. Честнейша же есть камней многоценных: не сопротивляется ей ничтоже лукаво. Благодатна есть всем приближающимся ей, всяко же честное недостойно ея есть. Долгота бо жития и лета жизни в деснице ея, в шуйце же ея богатство и слава: от уст ея исходит правда, закон же и милость на языке носит. Путие ея путие добри, и вся стези ея мирны. Древо живота есть всем держащимся ея, и воскланяющимся на ню, яко на Господа, тверда.

На стиховне самогласен дне, дважды, глас 4:

Желающе Божественныя Пасхи причаститися, / не от Египта, но из Сиона грядущия, / греховный квас отыдем покаянием: / препояшим чресла наша умерщвлением сластей: / украсим ноги сапогми, / возбранительными от всякаго дела лукаваго, / и утвердимся палицею веры: / не ревнуим врагом Владычняго Креста / боготворяще чрево, / но последуим постом, / на диавола победу нам показавшему, / Спасу душ наших.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Желающе Божественныя Пасхи причастится, / не от Египта, но из Сиона грядущия, / греховный квас отыдем покаянием: / препояшим чресла наша умерщвлением сластей: / украсим ноги сапогми, / возбранительными от всякаго дела лукаваго, / и утвердимся палицею веры: / не ревнуим врагом Владычняго Креста / боготворяще чрево, / но последуим постом, / на диавола победу нам показавшему, / Спасу душ наших.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Прославляемый в памятех святых Твоих / Христе Боже, / от них умоляемъ, / низпосли нам велию милость.

Слава, и ныне, Крестобогородичен, глас тойже.

Подобен: Яко добля:

На Кресте Тя яко узре пригвождена Господи, / Агница и Мати Твоя дивляшеся. / И что видение, глаголаше, / Сыне возжеленне? / Сия Ти неверный собор воздает беззаконный, / многих Твоих чудес насладивыйся: / но слава неизреченному схождению Твоему Владыко.

И прочее последование по обычаю.

В ЧЕТВЕРТОК ПЕРВЫЯ СЕДМИЦЫ НА ПОВЕЧЕРИИ

поем настоящий Великий канон преподобнаго отца нашего Андреа Критскаго и Иерусалимскаго. Творим же на кийждо тропарь поклоны 3, глаголюще и стих: Помилуй мя Боже, помилуй мя.

Песнь 1. Глас 6.

Ирмос по дважды. Помощник и Покровитель:

Аггче Божий, вземляй грехи всех, возми бремя от мене тяжкое греховное, и яко благоутробен, даждь ми слезы умиления.

Тебе припадаю Иисусе, согреших Ти, очисти мя, возми бремя от мене тяжкое греховное, и яко благоутробен, даждь ми слезы умиления.

Не вниди со мною в суд нося моя деяния, словеса изыскуя, и исправляя стремления: но в щедротах Твоих презирая моя лютая, спаси мя Всесильне.

Покаяния время, прихожду Ти Создателю моему, возми бремя от мене тяжкое греховное, и яко благоутробен, даждь ми слезы умиления.

Богатство душевное иждив грехом, пуст есмь добродетелей благочестивых, гладствуя же зову: милости подателю Господи, спаси мя.

Марии: Приклоньшия Христовым Божественным законом, к Сему приступила еси, сладостей неудержимая стремления оставивши, и всякую добродетель всеблагоговейно, яко едину исправила еси.

Слава, Троицен: Пресущественная Троице, во Единице покланяемая, возми бремя от мене тяжкое греховное, и яко благоутробна, даждь ми слезы умиления.

Богородичен: Богородице, надежде и предстательство Тебе поющих, возми бремя от мене тяжкое греховное, и яко Владычица Чистая, кающася прими мя.

Песнь 2.

Ирмос: Видите видите, / яко Аз есмь Бог, / манну одождивый, и воду из камене / источивый древле / в пустыни людем Моим, / десницею единою, / и крепостию Моею.

Мужа убих, глаголет, в язву мне, и юношу в струп, Ламех рыдая вопияше, ты же не трепещи о душе моя, окалявши плоть, и ум осквернивши.

Столп умудрила еси создати о душе, и утверждение водрузити твоими похотьми, аще не бы Зиждитель удержал советы твоя, и низвергл на землю ухищрения твоя.

О како поревновах Ламеху, первому убийце, душу яко мужа, ум яко юношу, яко брата же моего тело убив, яко Каин убийца, любосластными стремленьми.

Одожди Господь от Господа огонь иногда, на беззаконие гневающее сожег Содомляны: ты же огонь вжегла еси геенский, в немже имаши, о душе, сожещися.

Уязвихся, уранихся, се стрелы вражия уязвившия мою душу и тело: се струпы, гноения, омрачения, вопиют раны самовольных моих страстей.

Марии: Простерла еси руке твои к щедрому Богу, Марие, в бездне зол погружаемая: и якоже Петру человеколюбно, руку Божественную простре, твое обращение всячески иский.

Слава, Троицен: Безначальная, несозданная Троице, нераздельная Единице, кающася мя приими, согрешивша спаси: Твое есмь создание, не презри, но пощади, и избави мя огненного осуждения.

Богородичен: Пречистая Владычице Богородительнице, надеждо к Тебе притекающих, и пристанище сущих в бури, Милостиваго и Создателя, и Сына Твоего, умилостиви и мне молитвами Твоими.

Песнь 3.

Ирмос: Утверди Господи на камени:

Агаре древле душе, египтяныне уподобилася еси, поработившися произволением, и рождши новаго Исмаила, презорство.

Иаковлю лествицу разумела еси душе моя, являемую от земли к небесем, почто не имела еси восхода тверда, благочестия?

Священника Божия, и царя уединена, Христово подобие, в мире жития, в человецех подражай.

Обратися, постени душе окаянная, прежде даже не примет конец жития торжество: прежде даже дверь не заключит чертога Господь.

Не буди столп сланный душе, возвратившися вспять: образ да устрашит тя Содомский, горе в Сигор спасайся.

Моления Владыко, Тебе поющих не отвержи: но ущедри Человеколюбче, и подаждь верою просящим оставление.

Слава, Троицен: Троице простая, несозданная, безначальное Естество в Троице певаемая Ипостасей, спаси ны верою поклоняющиеся державе Твоей.

Богородичен: От Отца безлетно Сына, в лето Богородительнице, неискусомужно родила еси: странное чудо, пребывши Дева доящи.

Песнь 4.

Ирмос: Услыша пророк:

Время живота моего мало, и исполнено болезней и лукавства: но в покаянии мя приими, и в разум призови, да не буду стяжание, ни брашно чуждому, Спасе, Сам мя ущедри.

Царским достоинством, венцем и багряницею одеян, многоименный человек и праведный богатством кипя и стады, внезапно богатства, славы царства обнищав лишился.

Аще праведен баше он, и непорочен паче всех, и не убеже ловления льстиваго и сети: ты же грехолюбива сущи окаянная душе, что сотвориши, аще чесому о неведомых случится найти тебе?

Высокоглаголив ныне есмь, жесток же и сердцем, вотще и всуе, да не с фарисеем осудиши мя, паче же мытарево смирение подаждь ми едине Щедре, Правосуде, и сему мя сочисли.

Согреших, досадив сосуду плоти моя, вем Щедре: но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Самоистукан бых страстьми, душу мою вредя Щедре, но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Не послушах гласа Твоего, преслушах писание Твое законоположника: но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Марии: Великих безместий во глубину низведшися, неодолима была еси, но востекла еси помыслом лучшим, к крайней деяньми яве добродетели преславно, ангельское естество Марие, удививши.

Слава, Троицен: Нераздельное Существом, неслитное Лицы, богословлю Тя Троическое Едино Божество, яко единовластное и сопредельное, вопию Ти песнь великую, в вышних трегубо песнословимую.

Богородичен: **И** раждаеши, и девствуеши, и пребываеши обоюду естеством Дева: Рождейся обновляет законы естества, утроба же раждает нераждающая. Бог идеже хочет, побеждается естества чин: творит бо елика хочет.

Песнь 5.

Ирмос: **От** нощи утренюющая:

Низу сначающую подражай о душе, прииди, припади к ногама Иисусовыма, да ты исправит, и да ходиши право стези Господни.

Аще и кладязь еси глубокий Владыко, источи ми воду из пречистых Твоих жил, да яко самаряныня, не ктому пияй жажду: жизни бо струи источаеши.

Силоам да будут ми слезы моя, Владыко Господи, да умою и аз зеницы сердца, и вижду Тя умно, Света превечна.

Марии: Несравненным желанием всебогатая, Древу возжелевши поклонитися животному, сподобилася еси желанья, сподоби убо и мене улучшить вышния славы.

Слава, Троичен: Тя Троице славим, Единого Бога, Свят, Свят, Свят еси Отче, Сыне и Душе, простое Существо, Единице присно покланяемая.

Богородичен: Из Тебе облечеса в мое смешение, нетленная безмужная Мати Дево, Бог создавый веки, и соедини Себе человеческое естество.

Песнь 6.

Ирмос: Возопих всем сердцем:

Аз есмь, Спасе, юже погубил еси древле царскую драхму: но вжег светильник Предтечу Твоего Слове, взыщи и обрящи Твой образ.

Востани и побори, яко Иисус Амалика, плотския страсти, и Гаваониты, лестныя помыслы, присно побеждаючи.

Марии: Да страстей пламень угасиши, слез капли источила еси присно Марие, душею распаляема, ихже благодать подаждь и мне твоему рабу.

Марии: Безстрастие небесное стяжала еси, крайним на земли житием мати. Темже тебе поющим, страстей избавитися молитвами твоими, молися.

Слава, Троичен: Троица есмь проста, нераздельна, раздельна Личне, и Единица есмь Естеством соединена, Отец глаголет, и Сын и Божественный Дух.

Богородичен: Утроба Твоя Бога нам роди, воображенна по нам: Егоже, яко Создателя всех, моли Богородице, да Твоими молитвами оправдимся.

Кондак, глас 6:

Душе моя, душе моя, / востани, что спиши? / Конец приближается, / и имаша смутитися: / воспряни убо, да пощадит тя Христос Бог, / везде сый, и вся исполняяй.

Песнь 7.

Ирмос: Согрешихом:

Исчезоша днии мои, яко соние встающаго: темже яко Езекиа слезю на ложи моем, приложитися мне летом живота. Но кий Исаиа предстанет тебе душе, аще не всех Бог?

Припадаю Ти, и приношу Тебе, якоже слезы глаголы моя: согреших, яко не согреши блудница, и беззаконновах, яко иный никтоже на земли: но ущедри Владыко, творение Твое, и воззови мя.

Погребох образ Твой, и растлих заповедь Твою, вся помрачися доброта, и страстьми угасися, Спасе, свеща: но ущедрив воздаждь ми якоже поет Давид, радование.

Обратися, покайся, открий сокровенная, глаголи Богу вся ведущему: Ты веси моя тайная, едине Спасе: но Сам мя помилуй, якоже поет Давид по милости Твоей.

Марии: Возопивши к Пречистой Богоматери, первее отинула еси неистовство страстей, нужно стужающих, и посрамила еси врага запеншаго: но даждь ныне помощь от скорби, и мне рабу твоему.

Марии: Егоже возлюбила еси, Егоже возжелела еси, Егоже ради плоть изнурила еси преподобная, моли ныне Христа о рабех: яко да милостив быв всем нам, мирное состояние дарует почитающим Его.

Слава, Троицен: Троице простая, нераздельная, единосущная, и Естество едино, Светове и Свет, и Свята три, и Едино Свято поется Бог Троица, но воспой, прослави, Живот и Животы, душе, всех Бога.

Богородичен: Поем Тя, благословим Тя, поклоняемся Ти Богородительнице, яко неразлучныя Троицы породила еси единого Христа Бога, и Сама отверзла еси нам сущим на земли небесная.

Песнь 8.

Ирмос: Егоже воинства:

Слезную Спасе сткляницу, яко миро истощавая на главу, зову Ти якоже блудница, милости ищущая, мольбу приношу, и оставление прошу прияти.

Аще и никтоже, якоже аз согреши Тебе, но обаче приими и мене, Благоутробне Спасе, страхом кающаяся, и любовию зовуща: согреших Тебе единому: помилуй мя Милостиве.

Пошади Спасе Твое создание, и взыщи яко Пастырь погибшее, предвари заблуждшаго, восхити от волка, сотвори мя овча на пастве Твоих овец.

Егда Судие сядеши яко Благоутробен, и покажешу страшную славу Твою Спасе: о каковый страх тогда! Пещи горящей, всем боящимся нестерпимаго судища Твоего.

Марии: Света незаходимаго мати, тя просветивши, от омрачения страстей разреши. Темже вшедши в духовную благодать, просвети Марие, ты верно восхваляющая.

Марии: Чудо ново видево, ужасашеся божественный в тебе воистинну мати Зосима: ангела бо зряше во плоти, и ужасом весь исполняшеся, Христа поя во веки.

Слава, Троицен: Безначальне Отче, Сыне собезначальне, Утешителю Благий, Душе Правый: Слова Божия Родителю, Отца безначальна Слово, Душе живый и зиждяй, Троице Единице, помилуй мя.

Богородичен: Яко от оброщения червленицы Пречистая, умная багряница Еммануилева, внутрь во чреве Твоем плоть исткася. Темже Богородицу воистинну Тя почитаем.

Песнь 9.

Ирмос: Безсеменнаго зачатия:

Умилосердия спаси мя, Сыне Давидов помилуй, беснующияся словом исцеливый, глас же благоутробный яко разбойнику мне рцы: аминь глаголю тебе, со Мною будеши в раи, егда прииду во славе Моей.

Разбойник оглаголоваше Тя, разбойник Богословяше Тя, оба бо на кресте свисяста: но о Благоутробне, яко верному разбойнику Твоему, познавшему Тя Бога, и мне отверзи дверь славнаго Царствия Твоего.

Тварь содрогашеся распинаема Тя видящи, горы и камения страхом распадахуся, и земля сотрясашеся, и ад обнажашеся, и соомрачашеся свет во дни, зря Тебе Иисусе пригвождена ко Кресту.

Достойных покаяния плодов не истяжи от мене: ибо крепость моя во мне оскуде, сердце мне даруй присно сокрушенное, нищету же духовную, да сия Тебе принесу, яко приятную жертву, едине Спасе.

Судие мой, и ведче мой, хотяй паки приити со ангелы, судити миру всему, милостивным Твоим оком тогда видев мя, пощади и ущедри мя Иисусе, паче всякаго естества человека согрешивша.

Марии: Удивила еси всех странным житием твоим, ангелов чины, и человеков соборы, невещественно поживши, и естество прешедши: имже, яко невещественныма ногама вшедши Марие, Иордан прешла еси.

Марии: Умилостиви Создателя о хвалящих тя, преподобная мати, избавитися озлоблений и скорбей окрест нападающих: да избавившеся от напастей, возвеличим непрестанно прославльшаго тя Господа.

Андрею: Андрее честный, и отче треблаженнейший, пастырю Критский, не престай моляся о воспевающих тя: да избавимся вси гнева и скорби, и тления, и прегрешений безмерных, чтущии твою память верно.

Слава, Троичен: Отца прославим, Сына превознесем, Божественному Духу верно поклонимся, Троице нераздельней, Единице по Существу, яко Свету и Светом, и Животу и Животом, животворящему и просвещающему концы.

Богородичен: Град Твой сохраняй Богородительнице Пречистая: в Тебе бо сей верно царствуй, в Тебе и утверждается: и Тобою побеждай, побеждает всякое искушение, и пленяет ратники, и проходит послушание.

Таже поем оба лика: Безсеменнаго зачатия:

И прочее последование Повечерия.

В ПЯТОК ПЕРВЫЯ СЕДМИЦЫ НА УТРЕНИ

Троичны. По первом стихословии глаголем седальны Крестныя Осмогласника, и Богородичен.

По 2-м же стихословии седален господина Иосифа. Глас 2.

Подобен: Благообразный Иосиф:

Страстьми Твоими / безстрастие всем давай Человеколюбче, / страсти плоти моя / умертвив Крестом Божественным, / сподоби видети / и святое Воскресение Твое Господи.

Слава, тойже:

И ныне, Крестобогородичен:

Честным Крестом Сына Твоего / сохраняеми, Владычице Чистая Богородице, / всякий прилог борца, / вси удобь побеждаем: / темже Тя по долгу присно ублажаем, / яко Матерь Божию, / и едину надежду душ наших.

По 3-м же стихословии седален господина Феодора. Глас 2.

Подобен: Милосердия сущи:

Чистоты сый источник, / постом соблюди нас Милостиве, / призри на ны Тебе припадающия, / вонми воздеянию рук наших, / прострый длани Твои на Древе распинаемь / о всех земнородных, / безплотных едине Господи.

Слава, тойже.

И ныне, Крестобогородичен. Подобен:

Дева и Мати Твоя Христе, / на Древе зряще Тя мертва простерта, / плачущи горце, / Сыне Мой, глаголаше, / что страшное сие таинство? / Всем даруй жизнь вечную, / волею на Кресте / како умираеши смертью поносною?

Канон в Минеи на 6. И трипеснцы по чину их. Стихословим и пятую песнь обычно. Глас 2.

Песнь 5.

Ирмос: Просвещение во тьме лежащих:

Во мне зря грех, лъстивомудрый, спешится и содействует греху: радуется бо воистинну о моей погибели: но Ты ми даждь исправление Спасе, во онаго убиение, молюся.

Начала победивый тьмы, на Кресте Твоем, сих изми мя злодеяния, падшаго во глубину греха, и в яму безместных деяний, Твоею же милостию спастися уповающа.

Умертвивыйся на Кресте простерт, умерщвленную грехом оживи душу мою, и честное Твое Воскресение достигнути, в мире Христе сподоби, делающа усердно Твоя оправдания.

Богородичен: Просвещение моя немощи, спасение омраченныя души моя Чистая, спаси мя, спаси погибающа Отроковице, и в ризу нетления мя облещы, истлевшаго лютыми прегрешеньми.

Иный, глас тойже.

Ирмос: Нощи прешедшей, / приближися день, и свет миру возсия: / сего ради хвалят Тя ангельстии чини, / и славословят Тя / всяческая.

Ты на месте лобнем плотию распятися изволил еси, едине Безсмертне, человеческий род обезсмертствуя, и возображая Господи.

Страсти Твоя досаду, тварь зрящи вся прменяшеса, Господи, иудейскаго рыдающе убийства: но претерпел еси спасти всяческая.

Слава, Троицен: О Троице Всесвятая! Ты наше служение, Ты и прибежище и держава, в Естестве едином Ты воспевающим, очищение прегрешений низпосли.

Богородичен: Многоименитая Отроковице, радуйся Богородице, ковчеже, и стамно и трапезо, светоносный свещниче, огнезрачная купино, горо Божия присенная.

Слава Тебе Боже наш, слава Тебе.

Миру и сущим в мире радоватися прирекшии, ныне яко Христу сраспинаеми, претерпим досаду, ругание, и другая, да с Ним прославимся.

Ирмос: Нощи прешедшей, / приближися день, и свет миру возсия: / сего ради хвалят Тя ангельстии чини, / и славословят Тя / всяческая.

Песнь 8.

Ирмос: В пещь огненную:

Смиривый Себе, вознеслся еси за благоутробие на Крест, возвышай падшаго с недю древа иногда: темже Ты едине Преплагий, прославленнаго поем во веки.

Невнимания дреманием греха тяжкий подъях сон: но Ты уснувший на Кресте мене ради Христе мой, воздвигни мя падшаго, да мя не примет ночь смертная.

Ослепився сластьми, обношу душу омраченную, и смеется зря мя льстивомудрый враг: темже мя просвети, и избави сего злобы, Христе во веки.

Богородичен: В лености жизнь иждив, дреманием греха душу отягчих: неусыпной же Твоей молитве притекаю, не даждь мне в смерти Дево Пречистая, уснути.

Иный.

Ирмос: В купине Моисею, / Девы чудо, на Синайстей горе / прообразившаго иногда, / пойте, благословите / и превозносите во вся веки.

Тернием венчався, и во одежду от порфиры оболкся, явился еси краснейший Христе, добротою паче всех сынов человеческих, славою облиставая.

Желчь и оцет пия, две струи проливаеши, живота и нетления, из Божественных Твоих ребр, верою Тя поющим, и славословящим Христе во вся веки.

Благословим Отца, и Сына, и Святаго Духа, Господа.

Троичен: Божество едино Троице, неразделимое Естество, раздельная же Лицы, негиблющая державо, Отче, Сыне и Душе, Тя песнословим во вся веки.

Богородичен: Богородительнице Чистая, небесная дворе, спасительная врата, всех христиан моление прими, Тебе блажащих во вся веки.

Слава Тебе Боже наш, слава Тебе.

Кресте скиптре Христов, Церкви роге, царей победо, хранителю христиан, ты еси просвещение мое, ты и похвала моя во вся веки.

Хвалим, благословим, поклоняемся Господеви:

Ирмос: В купине Моисею, / Девы чудо, на Синайстей горе / прообразившаго иногда, / пойте, благословите / и превозносите во вся веки.

Песнь 9.

Ирмос: Яже прежде солнца:

Прокаженную душу мою безместными помышлении, окроплением крове Твоя очисти Божий Слове, и общника мя славы Твоя сотвори, мене ради безславное претерпевый Христе распятие.

Весь слякохся тяготою безместных, Христе, деяний, и сетуя зову Ти, Человеколюбче: души моя неисцельныя язвы исцели Твоею честною кровию, да пою Твое Божество.

Снедь злобу, и питье небрежение творя, по всему пребываю неисправлен, снедей ошаянием безвременно радуясь: не сицевому бо посту рече Господь быти.

Богородичен: Лютаго древняго отречения губительницу, и праматере исправление, рода к Богу вину присвоения, к Зиждителю мост, Тя Богородице величаем.

Иный.

Ирмос: Чистую и Пречистую Матерь и Деву, / песнями песней, вси вернии, / благочестно яко Богородицу / величаем.

На Древе распеншуся Ти тварь колебашеся, Бог сый пострадал еси плотски, за благоутробие щедрот, да спасеши нас.

Креста Твоего Господи, сила великая: ибо образуяще сего в себе, абие демонов крепость отражаем.

Слава, Троицен: Единице Триипостасная, Троице единственная, господоначалие, Естество равнославное, Отче, Сыне, и Божественный Душе, спаси всех нас.

Богородичен: Радуйся очистилище миру Богородице, в неже притекающе вси грешнии, к Богу примирение присно обретаем.

Слава Тебе Боже наш, слава Тебе.

Креста Твоего Господи, Божественным могуществом укрепи мя, непорочное и чистое время поста, Тебе приносить.

Ирмос: Чистую и Пречистую Матерь и Деву, / песнями песней, вси вернии, / благочестно яко Богородицу / величаем.

Светилен гласа.

На стиховне самогласен дне, дважды, глас 8:

Постное завещание радостно восприимем: / аще бо бы сие праотец сохранил, / Едемскаго отпадения не прияли быхом. / Красный бе в видение, и добрый в снедь, / уморивый мене плод: / да не восхитимся веждами, / ни да усладится наша гортань почитаемыми брашны, / по приятии же безчестуемыми. / Бежим невоздержания, / и по насыщении страстем не покоримся. / Назнаменаимся кровию, / о нас веденаго на смерть волею, / и не коснется нас губитель: / и снемы Пасху Христову священнейшую, / во спасение душ наших.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Постное завещание радостно восприимем: / аще бо бы сие праотец сохранил, / Едемскаго отпадения не прияли быхом. / Красный бе в видение, и добрый в снедь, / уморивый мене плод: / да не восхитимся веждами, / ни да усладится наша гортань почитаемыми брашны, / по приятии же безчестуемыми. / Бежим невоздержания, / и по насыщении страстем не покоримся. / Назнаменаимся кровию, / о нас веденаго на смерть волею, / и не коснется нас губитель: / и снемы Пасху Христову священнейшую, / во спасение душ наших.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.

Мученичен: Что вы наречем святии? / херувимы ли? / яко на вас почил есть Христос. / Серафимы ли? / яко непрестанно прослависте его. / Ангелы ли? / тела бо отвратистеся. / Силы ли? / действуете бо чудесы. / Многая ваша имена, / и большая дарования, / молити спастися душам нашим.

Слава, и ныне, Крестобогородичен, глас тойже.

Подобен: О преславнаго чудесе!

Яко виде Тя распинаема на лобнем Спасе, / изменяшеся вся тварь, / и содрогашеся движущеся не терпящи. / Дева же Чистая и Мати Твоя, / рыдаючи Тебе вопияше: / увы мне, о Чадо Мое, / Спасе Мой сладчайший, / что новое сие и преславное и странное видение?

Благо есть: и прочее последование. Час 1-й без стихословия: такожде и в прочия пятки святых великих 40-цы.

НА 6-М ЧАСЕ ТРОПАРЬ, ГЛАС 5:

Многогреховное наше житие, / и непокаянный нрав щедротами предвари
Господи: / разве бо Тебе иного не вемы, / животом и смертию владычествующа,
/ спаси яко Человеколюбец.

**Прокимен, псалом 17, глас 7: Возлюблю Тя Господи крепосте моя,
Господь утверждение мое.**

Стих: Бог мой, помощник мой.

Пророчества Исаиина чтение. [Глава 3, ст. 1 – 14.]

Се Владыка Господь Саваоф отымет от Иерусалима и от Иудеи крепкаго, и крепкую, крепость хлеба, и крепость воды: Исполина, и крепкаго, и человека ратника, и судию, и пророка, и смотреливаго, и старца: И пятьдесятоначальника, и дивнаго советника, и премудраго архитектона, и разумнаго послушателя. И поставлю юноши князи их, и ругатели господствовать будут ими: И нападати имут людие, человек на человека, и человек на ближняго своего: приразится отроча к старцу, и безчестный к честному. Яко имется человек брата своего, или домашняго отца своего, глаголя: ризу имаши, началовождь нам буди, и брашно мое под тобою да будет. И отвещав в день оный речет: не буду твой началовождь, несть бо в дому моем ни хлеба, ни ризы: не буду началовождь людем сим. Яко оставлен бысть Иерусалим и Иудеа паде, и язык их со беззаконием, не покажутся Господеви. Сего ради ныне смирися слава их, и студ лица их противу ста им: грех же свой яко Содомский возвестиша, и явиша. горе души их, зане умыслиша совет лукавый на себе самих, Рекше: свяжем праведнаго, яко непотребен нам есть: убо плоды дел своих снедят. Горе беззаконному, лукавая бо приключатся ему по делом рук его. Людие мои, приставницы ваши пожинают вас, и истязующии обладают вами: людие мои, блажащии вас льстят вы, и стези ног ваших возмущают. Но ныне устроится Господь на суд, и поставит на суд люди Своя. Сам Господь на суд приидет со старейшины людей, и с князи их.

Прокимен, псалом 18, глас 6: Господи, Помощниче мой, и Избавителю мой.

Стих: Небеса поведают славу Божию:

Ведомо да есть, яко последование Минеи прилучившагося святаго в субботу и в Неделю поется на Повечерии, или егда хошет еклисиарх.